

21 FEB 2003

Mastika-Ilmu

PEMIMPIN PERLU UBAH MINDA MASYARAKAT, KATA MASTIKA

KANGAR, 21 Feb (Bernama) -- Para pemimpin masyarakat perlu memainkan peranan untuk mengubah minda masyarakat yang dipimpin mereka supaya boleh menjadi rakyat yang bersedia mencari ilmu tanpa memikirkan sebarang ganjaran sampingan.

Pengerusi Perbadanan Kraftangan Malaysia Mastika Junaidah Hussin berkata kerajaan, termasuk Perbadanan Kraftangan Malaysia, sendiri banyak menganjurkan majlis ilmu untuk masyarakat tetapi sambutan yang diberi agak mendukacitakan.

"Ternyata sekali masyarakat lebih gemar hadir pada sesuatu majlis jika ada tawaran ganjaran tertentu seperti hamper, hadiah atau cabutan bertuah dan jika tidak ada tawaran sedemikian, mereka kurang berminat menghadirinya walaupun ia merupakan majlis ilmu," katanya.

Mastika yang juga anggota Parlimen Arau berkata demikian semasa berucap merasmikan Kursus Kepimpinan Kumpulan Peladang Wanita (KPW) untuk 100 pemimpin KPW seluruh negeri anjuran bersama Jabatan Pembangunan Wanita dan MADA Daerah 1 di sini hari ini.

Beliau berharap melalui kursus sehari itu, banyak maklumat berguna dapat diperolehi yang boleh dijadikan panduan untuk dipanjangkan kepada anggota masyarakat di bawah pimpinan mereka khusus ke arah mengubah setiap minda negatif.

Beliau memberi jaminan bahawa banyak ilmu yang boleh ditimba oleh kaum wanita di negara ini daripada perbadanan tersebut yang boleh diaplikasikan untuk menambah pendapatan seperti projek kraftangan komersial.

Peluang yang disediakan itu akan sia-sia jika masyarakat sendiri kurang berminat mencari ilmu untuk menghadiri sesuatu majlis penerangan dan kursus bagi mempelajari pelaksanaan sesuatu projek tersebut, katanya.

Sebelum itu, pentadbir MADA Kedah/ Perlis, Shuib Hashim berkata MADA turut menggalakkan peladang khususnya kaum wanita, melibatkan diri dalam projek-projek yang menguntungkan, terutama industri kecil di kampung.

Beliau berharap para pemimpin peladang di negeri ini khususnya di peringkat kampung menyambut baik usaha tersebut bagi merealisasikan harapan Perdana Menteri, Datuk Seri Dr Mahathir Mohamad ke arah mewujudkan satu kampung satu industri.

-- BERNAMA

RIS LAT